



## KOMUNIKADU IMPRENSA

### **Timor-Leste: Parlamentu Nasional adia debate lei rua kona ba implementasaun rekomendasaun CAVR no CVA nian**

**DILI, Septembru 30**— Grupu vitima sira nian senti frustradu no laran moras tanba parlamentu desidi atu adia debate lei rua ne'ebe importante ba justisa.

Iha Septembru 29, Parlamentu Nasional Timor-Leste desidi atu adia, to'o Fevreiru 2011, debate kona ba ezbosu lei rua ne'ebe atu implementa rekomendasaun xave balun husi Timor-Leste nia komisaun lia loos rua, Komisaun Simu Malu, Lia-loos no Rekonsiliaun (CAVR) no Komisaun Lia-loos no Amizade (CVA).

Grupu vitima hatete katak desizaun ida ne'e hatudu katak deputadu balun lakohi hare vitima nia direitu hanesan asuntu ne'ebe importante.

“Prosesu ne'e lao naruk liu, komesa husi Junhu 2008 ne'ebe lolos komesa debate relatoriu CAVR no CTF to'o hato'o ezbosu lei ba implementasaun rekomendasaun husi Komisaun 2 sempre hetan pro kontra husi deputadus sira. Karik adia bebeik hanesan deit la fo rekonesimentu no importansia ba relatoriu komisaun rua ne'ebe mos envolve vitima barak nia halerik no esperansa,” hatete ICTJ Timor-Leste nia Koodenadora Programa, Manuela Pereira.

Ezbosu lei rua ne'e propoin atu establese kuadramentu ba programa nasional reparasaun ida, no Institutu Memoria ida ne'ebe sei tau matan ba implementasaun rekomendasaun hirak ne'ebe refere ba reparasaun ba vitima, buka ema lakon tanba konflitu, dokumentasaun no edukasaun kona ba direitus umanus.

“Povu sivil Timor-Leste sofre tinan naruk husi tinan 1975 to'o 1999, ema barak sei terus nafatin la iha kbit no la iha atensaun atu hadia sira nia situasaun no kura sira nia kanek maski tinan 10 ona independensia,” hatete Pereira. “Lolos fo prioridade mos ba asuntu ida ne'e tanba vitima sira hein kleur ona, ita lakohi sira terus tan no lakohi atu gerasaun foun aprende atu desvaloriza povu bai-bain nia terus.”

#### **Antecedente**

Komisaun Simu Malu, Lia-Los no Rekonsiliaun (CAVR) nia mandatu atu investiga violasaun direitus umanus ne'ebe komete durante konflitu armadu tinan 25 Timor-Leste nian, ajuda restora dignidade vitima sira nian no mos promove rekonsiliaun no reintegra fali suspeitu sira ba krime kiik ba sira nia komidade.

Iha ninia relatoriu final, CAVR halo rekomendasaun 200 ba leten ba institusaun estadu Timor-Leste no Indonesia nian, komidade internasional, igereja Katoliku no sosiadade sivil Timor-Leste nian kona ba reforma no insiativa ne'ebe tenke halao hodi prevene violasaun direitus umanus la akontese fila fali. Rekomendasaun xave inklui mos lori autor krime grave sira ba justisa no medidas oi-oin hodi kria institusaun estadu nian ne'ebe forte no responsavel.

Komisaun Lia-los no Amizade (CVA) hanesan komisaun bilateral Timor-Leste no Indonesia nian, ne'ebe establese iha 2004, hetan mandatu atu determina 'lia-loos ne'ebe konklusivu' kona ba violensia ne'ebe akontese antes no depois konsultasaun popular iha 1999. CVA hetan kritika husi organizasaun sosiadade sivil Timor-Leste nian no mos Organizasaun Nasaun Unidas tanba iha poder atu rekomenda amnestia. A final, CVA la uza poder amnestia ne'e no ninia rekomendasaun barak mak konsistente ho rekomendasaun CAVR nian.

Prezidente Timor-Leste prezenta relatoriu final CAVR nian ba parlamentu iha dia 28 Novembru 2005 no CVA nian iha dia 9 October 2008.

Depois parlamentu falla dala balun atu debate relatoriu CAVR no CVA, tanba sensibilidade isu ne'ebe relasiona ho konflitu uluk nian, iha Dezembru 2009 parlamentu husu Komisaun ba Asuntus Konstitusionais, Justisa, Administrasaun Publika, Poder Lokal no Legislasaun Governamental (Komisaun A), atu propoin medidas konkretu atu implementa CAVR no CVA nia rekomendasaun sira. Entaun Komisaun A hakerek lei rua ne'ebe parlamentu agora sei debate iha Fevreiru 2011.

### **Kona-ba ICTJ**

ICTJ nian servisu atu hadi'a no prevene violasaun direitus umanus ne'ebé todan liu hosi hasoru impaktu husi abuzu masa. ICTJ buka solusaun hirak ne'ebé olístiku atu promove responsabilidade ka akuntabilidade, no kria sosiedade hirak ne'ebé justu no hakmatek. Atu hetan informasaun liu tan, vizita [www.ictj.org](http://www.ictj.org).

### **Kontaktu**

Manuela Pereira  
Program Coordinator, ICTJ Timor-Leste Office  
Tel: +670 723 7267  
[mpereira@ictj.org](mailto:mpereira@ictj.org)

Lisa Jamhoury  
Communications Associate, New York  
Tel: 1.917.637.3846  
[ljamhoury@ictj.org](mailto:ljamhoury@ictj.org)